

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
VLADA

NACRT

ZAKON
O IZMJENAMA I DOPUNAMA ZAKONA O SOCIJALNOJ ZAŠTITI,
ZAŠTITI CIVILNIH ŽRTAVA RATA I ZAŠTITI PORODICE SA DJECOM

Nosilac izrade:
Ministarstvo za rad, socijalnu politiku,
raseljena lica i izbjeglice

Sarajevo, mart 2024. godine

Na osnovu čl.13. stav 1. tačka e) i 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04, 6/13 i 31/17), člana 8. Zakona o osnovama socijalne zaštite, zaštite civilnih žrtava rata i zaštite porodice sa djecom ("Službene novine Federacije Bosne i Hercegovine", br. 36/99, 54/04, 39/06, 14/09, 45/16, 40/18 i 16/23) i člana 4. Zakona o zaštiti civilnih žrtava rata u Federaciji Bosne i Hercegovine ("Službene novine Federacije Bosne i Hercegovine", broj: 60/23), Skupština Kantona Sarajevo, na sjednici održanoj _____ godine, donijela je

NACRT

ZAKON O IZMJENAMA I DOPUNAMA ZAKONA O SOCIJALNOJ ZAŠTITI, ZAŠTITI CIVILNIH ŽRTAVA RATA I ZAŠTITI PORODICE SA DJECOM

Član 1.

U Zakonu o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj: 38/14-Prečišćeni tekst, 38/16, 44/17, 28/18, 52/21 i 40/22) u članu 6. iza stava 1. dodaje se novi stav 2. koji glasi:

"Izuzetno od stava 1. ovog člana, strani državljanin kojem je priznata međunarodna zaštita u Bosni i Hercegovini, prava iz ovog zakona ostvaruje u skladu sa propisom nadležnog organa Bosne i Hercegovine kojim se uređuje način ostvarivanja prava na socijalnu pomoć licima kojima je priznata međunarodna zaštita u Bosni i Hercegovini."

Član 2.

U članu 13. stav 5. mijenja se i glasi:

"Službe su dužne po službenoj dužnosti vršiti provjeru svih predmeta smještaja u ustanove socijalne zaštite i institucije u koje se smještaju korisnici u skladu sa ovim zakonom, najmanje jednom u dvanaest mjeseci počevši od donošenja rješenja."

Član 3.

U članu 18. stav 1. broj: "30" zamjenjuje se brojem: "40".

Član 4.

U članu 22. iza stava 1. dodaje se novi stav 2. koji glasi:

"Pravo na stalnu novčanu pomoć ne mogu ostvariti osobe koje su smještene u ustanove socijalne zaštite ili institucije u koje se smještaju korisnici u skladu sa ovim zakonom ili hraniteljske porodice."

Član 5.

U članu 24. riječi: "i osobama smještenim u ustanove socijalne zaštite" brišu se.

Član 6.

U članu 27. stav 1. riječi: "iznos 40% prosječne plaće" zamjenjuju se riječima: "iznos 60 % najniže penzije u Federaciji Bosne i Hercegovine utvrđene za mjesec u kojem je podnesen zahtjev za ostvarivanje prava na novčanu naknadu za pomoć i njegu od strane druge osobe".

Iza stava 1. dodaje se novi stav 2. koji glasi:

"Centar će za svaki mjesec u kalendarskoj godini od Federalnog zavoda PIO/MIO pribaviti dokaz o iznosu najniže penzije iz stava 1. ovog člana."

Dosadašnji st. 2. i 3. postaju st. 3. i 4..

Član 7.

U članu 30. broj: "20" zamjenjuje se brojem: "30".

Član 8.

U članu 34. broj: "40" zamjenjuje se brojem: "90".

Član 9.

U članu 42. stav 3. broj: "20" zamjenjuje se brojem: "30".

Član 10.

U članu 43. stav 1. alineja 2. mijenja se i glasi:

" - ako se korisniku oduzme u potpunosti poslovna sposobnost".

Član 11.

U članu 44. riječi: "bez svoje krivice" brišu se.

Član 12.

U članu 57. iza stava 1. dodaje se novi stav 2. koji glasi:

"Izuzetno, ukoliko se korisnik smješta u ustanovu socijalne zaštite ili institucije u koje se smještaju korisnici u skladu sa ovim zakonom u neradne dane ili u noćnim satima, Služba rješenje donosi prvog narednog radnog dana i istog dana dostavlja ustanovi socijalne zaštite, institucija, odnosno korisniku ili ovlaštenoj osobi."

Stav 2. postaje stav 3..

Član 13.

U članu 58 b. stav 1. iza riječi: "kapaciteta ustanove" dodaje se interpunkcijski znak: "zarež" i riječi: "izuzev Javne ustanove Terapijska zajednica – Kampus Kantona Sarajevo u koju se može primiti na smještaj najviše do 10% kapaciteta ustanove".

Član 14.

Član 59. mijenja se i glasi:

“Član 59.

Kućna njega i pomoć u kući je organizirano pružanje raznih vrsta usluge, kao što su: prehrana, obavljanje kućnih i drugih poslova održavanja kuće, održavanje lične higijene i pružanje drugih svakodnevnih potreba u kući osobama koje imaju osigurane boravišne i druge životne uslove u okruženju gdje žive, ali zbog starosti, promjena u zdravstvenom stanju ili utvrđenog invaliditeta ne mogu voditi brigu o sebi, niti im članovi porodice mogu pružiti tu brigu.

Usluge kućne njege i pomoći mogu pružati ustanove, nevladine organizacije ili druge pravne osobe registrirane za pružanje usluge kućne njege i pomoći u kući sa kojima Centar svake godine zaključi sporazum o pružanju usluge kućne njege i pomoći u kući kojim se reguliše način pružanja ove usluge, cijena usluge kućne njege i pomoć u kući i druga bitna pitanja.”

Član 15.

Član 60. se mijenja i glasi:

“Član 60.

Osobe iz člana 60. stav 1. ovog zakona ostvaruju pravo na kućnu njegu i pomoć u kući pod uslovom da im ukupan prihod po članu domaćinstva, u koji ne ulazi prihod iz člana 9. stav 1. tačka 6. ovog Zakona mjesečno ne prelazi iznos:

- najniže penzije u Federaciji Bosne i Hercegovine utvrđene za mjesec u kojem je podnesen zahtjev za ostvarivanje prava na kućnu njegu i pomoć u kući, ukoliko se radi o jednočlanom domaćinstvu;
- 60 % najniže penzije u Federaciji Bosne i Hercegovine utvrđene za mjesec u kojem je podnesen zahtjev za ostvarivanje prava na kućnu njegu i pomoć u kući, ukoliko se radi o višečlanom domaćinstvu.

Pravo na kućnu njegu i pomoć u kući ostvaruje se pod uslovom da osoba iz člana 60. stav 1. ovog zakona ne ostvaruje pravo na novčanu naknadu za pomoć i njegu od strane druge osobe po ovom zakonu ili dodatak za njegu i pomoć od druge osobe po Federalnom zakonu.

Centar će za svaki mjesec u kalendarskoj godini od Federalnog zavoda PIO/MIO pribaviti dokaz o iznosu najniže penzije iz stava 1. ovog člana.”

Član 16.

Član 61. se mijenja i glasi:

“Član 61.

Potrebu za pružanje usluge kućne njega i pomoć u kući nalazom i mišljenjem utvrđuje u prvom stepenu prvostepena ljekarska komisija Stručne institucije, a u drugom stepenu po žalbi drugostepena ljekarska komisija Stručne institucije."

Član 17.

Član 62. se mijenja i glasi:

“Član 62.

Pravo na uslugu kućne njega i pomoć u kući se ostvaruje rješenjem Službe ili zaključivanjem privatnih ugovora o pružanju usluge kućne njega i pomoć u kući između korisnika ove usluge ili ovlaštene osobe i pružaoca ove usluge.

Rješenjem Službe ili ugovorom iz stava 2. ovog člana utvrđuje se broj usluga kućne njega i pomoći u kući u jednom mjesecu u skladu sa nalazom nadležnih ljekarskih komisija iz člana 61. ovog zakona.

Član 18.

Član 63. mijenja se i glasi:

“Član 63.

Cijena usluge kućne njega i pomoć u kući koja se pruža na osnovu rješenja Službe utvrđuje se početkom svake kalendarske godine aktom Vlade Kantona Sarajevo.

Cijenu usluge kućne njega i pomoć u kući koja se pruža na osnovu privatnih ugovora utvrđuje ustanova, nevladina organizacija ili druga pravna osoba iz člana 59. stav 2. ovog Zakona”.

Član 19.

U članu 68. stav 1. iza riječi: “ustanove” dodaju riječi: “socijalne zaštite (u daljem tekstu: ustanove)”.

Iza stava 3. dodaje se novi stav 4. koji glasi:

“Ustanove mogu u okviru svoje djelatnosti organizovati i implementirati usluge koje su usmjerene na prevenciju institucionalizacije i deinstitucionalizaciju korisnika, kao i druge usluge u cilju pružanja pomoći licima u stanju socijalne potrebe.”

Član 20.

U članu 96. stav 1. riječ: "savjetovališta" zamjenjuje se riječima: "Porodičnog savjetovališta (u daljem tekstu: Savjetovalište)".

Iza stava 3. dodaje se novi stav 4. koji glasi:

"Savjetovalište je po osnovu postupka koji vodi organ starateljstva u konkretnom predmetu obavezno prioritetno primiti na savjetovanje lice koje uputi organ starateljstva."

Član 21.

U Glavi V – ZAŠTITA CIVILNIH ŽRTAVA RATA, naziv Odjeljka: “2. Pomoć u troškovima liječenja i nabavci ortopedskih pomagala” mijenja se i glasi: “2. Pomoć u troškovima banjškog liječenja i nabavci ortopedskih pomagala”.

Član 22.

Član 123. briše se.

Član 23.

Član 124. mijenja se i glasi:

“Član 124.

Pomoć u troškovima banjškog liječenja radi rehabilitacije obezbjeđuje se civilnim žrtvama rata koje su ostvarile pravo na:

- ličnu invalidninu,
- dodatak za njegu i pomoć od strane drugog lica, ili
- ortopedski dodatak.

Pomoć u troškovima banjškog liječenja obezbjeđuje se osobama iz stava 1. ovog člana kojima je nalazom i mišljenjem Stručne institucije utvrđena potreba za banjškim liječenjem.

Postupak, uslovi i način ostvarivanja prava na banjško liječenje urediće se pravilnikom koji donosi ministar.”

Član 24.

U članu 136. stav 1. riječi: "bez jednog ili oba roditelja" zamjenjuju se riječima: "kojem jedan ili oba roditelja nisu živi ili jedan od roditelja nije upisan u rodni list."

Član 25.

U članu 137. st. 2. i 3. mijenjaju se i glase:

"Dodatak na djecu u smislu člana 6. stav 2. Federalnog zakona pripada djeci i nakon 18. godine života ukoliko se redovno školuju, odnosno studiraju na nekoj od visokoškolskih ustanova na području Bosne i Hercegovine, najduže do 27 godina života.

Izuzetno od stava 1. ovog člana djeca iz člana 36. ovog zakona, za vrijeme školovanja i osposobljavanja za život i rad, kao i za vrijeme dok je dijete usljed bolesti ili liječenja spriječeno da izvršava obaveze u u školi, mogu ostvariti pravo na dodatak na djecu do 26 godina života."

Član 26.

U članu 141. stav 1. mijenja se i glasi:

"Pod uslovima za ostvarivanje prava na dječiji dodatak propisanim u Zakonu o materijalnoj podršci, djeca nakon navršene 18. godine mogu ostvariti pravo na dječiji dodatak za vrijeme redovnog studiranja ukoliko nastave redovno školovanje na nekoj od visokoškolskih ustanova na području Bosne i Hercegovine, a najkasnije do navršenih 27. godina.

St. 3., 4. i 5. brišu se.

Član 27.

Iza člana 141. dodaje se novi član 141 a. koji glasi:

"Član 141 a.

Pravo na dodatak na djecu i dječiji dodatak za vrijeme redovnog studiranja prestaju djetetu koje studira ako:

- u toku studija izgubi više od jedne godine na visokoškolskoj ustanovi;
- nakon završenog školovanja na visokoškolskoj ustanovi upiše školovanje istog stepena.

Korisnik prava na dodatak na djecu i dječiji dodatak za vrijeme redovnog studiranja, dužan je da u svakoj kalendarskoj godini u periodu od 01. septembra do 31. oktobra tekuće godine nadležnom organu dostavi dokaze o ispunjavanju uvjeta za ostvarivanje prava na dodatak na djecu i dječiji dodatak za vrijeme redovnog studiranja.

Ukoliko korisnik iz stava 2. ovog člana ne dostavi dokaze u propisanom roku, pravo na dodatak na djecu i dječiji dodatak za vrijeme redovnog studiranja prestaje sa 30. septembrom tekuće godine.

Ostvarivanje jednog od prava iz stava 1. ovog člana za djecu koja redovno studiraju, ne isključuje mogućnost ostvarivanja drugog prava iz stava 1. ovog člana."

Član 28.

U članu 144. stav 3. riječi: "ustanove dječije i socijalne zaštite", zamjenjuju se riječima: "ustanove socijalne zaštite ili institucije u koje se smještaju korisnici u skladu sa ovim zakonom."

Član 29.

U Glavi VI – ZAŠTITA PORODICE SA DJECOM, u nazivu Odjeljka 2. riječi: "dodatna pomoć na ime brige i njege djeteta" zamjenjuju se riječima: "porodiljski dodatak".

Član 30.

Član 148. mijenja se i glasi:

"Član 148.

Žena - majka u radnom odnosu za vrijeme dok odsustvuje sa posla radi trudnoće, porođaja i njege djeteta (u daljem tekstu: žena - majka u radnom odnosu) može ostvariti pravo na naknadu umjesto plaće (u daljem tekstu: naknada plaće) i pravo na porodiljski dodatak u skladu sa ovim zakonom.

Ženi – majci u radnom odnosu koja u skladu sa ovim zakonom ostvari prava iz stava 1. ovog člana, može se na ime ovih prava iz sredstava Budžeta Kantona Sarajevo isplatiti ukupan novčani iznos do iznosa prosječne plaće u Federaciji Bosne i Hercegovine za prethodnu godinu koja se

utvrđuje na osnovu posljednjeg objavljenog statističkog podatka Federalnog zavoda za statistiku za prethodnu godinu (u daljem tekstu: ukupan iznos).

Član 31.

Iza člana 148. dodaje se novi član 148 a. koji glasi:

"Član 148 a.

Izuzetno od člana 6. ovog zakona, žena - majka u radnom odnosu koja nije državljanka Bosne i Hercegovine - u skladu sa ovim zakonom može ostvariti prava iz člana 148. ovog zakona pod uslovom da ima odobren stalni boravak u Bosni i Hercegovini, te da ispunjava uslove u pogledu prebivališta u Kantonu Sarajevo.

Izuzetno od člana 7. ovog zakona žena – majka u radnom odnosu može ostvariti prava iz člana 148. ovog zakona pod uslovom:

- da ima boravište u Kantonu Sarajevo i utvrđen status raseljene osobe, ili
- da ima boravište ili prebivalište u Kantonu Sarajevo kraće od 12 mjeseci i da otac djeteta ima prebivalište u Kantonu Sarajevo najmanje 12 mjeseci, da je zaposlena kod poslodavca čije je sjedište u Kantonu Sarajevo, ili joj je mjesto rada u Kantonu Sarajevo i da ne ostvaruje ovo pravo u mjestu boravišta ili prebivališta."

Član 32.

Član 149. mijenja se i glasi:

"Član 149.

Žena – majka u radnom odnosu koja najmanje 12 mjeseci prije odlaska na porodiljsko odsustvo ima zaključen ugovor o radu ili rješenje o zasnivanju radnog odnosa i prijavu na obavezno osiguranje po osnovu radnog odnosa, u skladu sa uslovima propisanim ovim zakonom, ostvaruje naknadu plaće u iznosu najniže plaće u Federaciji Bosne i Hercegovine za prethodnu godinu koju utvrđuje nadležni organ (u daljem tekstu: najniža federalna plaća).

Žena – majka u radnom odnosu koja manje od 12 mjeseci prije odlaska na porodiljsko odsustvo ima zaključen ugovor o radu ili rješenje o zasnivanju radnog odnosa i prijavu na obavezno osiguranje po osnovu radnog odnosa, u skladu sa uslovima propisanim ovim zakonom, ostvaruje naknadu plaće u iznosu 50% najniže federalne plaće.

Žena - majka u radnom odnosu kojoj poslodavac u cjelosti isplaćuje naknadu plaće po osnovu porodiljskog odsustva ne može ostvariti naknadu plaće u skladu sa ovim zakonom."

Član 33.

Član 150 a. mijenja se i glasi

"Član 150 a.

Žena – majka u radnom odnosu može ostvariti pravo na porodiljski dodatak ukoliko je ostvarila naknadu plaće koja je manja od ukupnog iznosa.

Ukoliko žena - majka u radnom odnosu ostvari naknadu plaće isključivo po osnovu člana 149. stav 1. ovog zakona porodiljski dodatak iznosi novčanu razliku od najniže federalne plaće do ukupnog iznosa.

Ukoliko žena - majka u radnom odnosu ostvari naknadu plaće isključivo po osnovu člana 149. stav 2. ovog zakona porodiljski dodatak iznosi novčanu razliku od 50% najniže federalne plaće do ukupnog iznosa.

Ukoliko žena - majka u radnom odnosu kod poslodavca ostvari naknadu plaće u cjelosti, a taj iznos je manji od ukupnog iznosa, žena – majka u radnom odnosu ima pravo na porodiljski dodatak u iznosu novčane razlike od naknade plaće koju je ostvarila kod poslodavca do ukupnog iznosa.

Ukoliko poslodavac isplaćuje ženi – majci u radnom odnosu razliku naknade plaće od iznosa novčane naknade plaće po ovom zakonu do ukupnog iznosa i više, žena majka u radnom odnosu nema prava na porodiljski dodatak.

Ukoliko poslodavac isplaćuje ženi – majci u radnom odnosu razliku od ukupnog iznosa do iznosa njene plaće, žena – majka ima pravo na naknadu plaće i porodiljski dodatak u punom iznosu."

Član 34.

Član 153. mijenja se i glasi:

"Član 153.

Jedan od roditelja kojem je u skladu sa propisima o radu odobren rad sa polovinom punog radnog vremena, može ostvariti pravo na naknadu plaće za polovinu radnog vremena kad ne radi i to:

- za blizance, treće i svako slijedeće dijete, najduže do dvije godine života djeteta;
- za pojačanu brigu i njegu djeteta, prema nalazu nadležne zdravstvene ustanove, najduže do tri godine života djeteta.

Naknada plaće iz stava 1. ovog člana se ostvaruje u iznosu najniže federalne plaće."

Član 35.

Iza člana 153. dodaju se novi čl. 153 a. i 153 b. koji glase:

"Član 153 a.

Jedan od roditelja kojem je u skladu sa propisima o radu odobren rad sa polovinom punog radnog vremena može ostvariti naknadu plaće za polovinu radnog vremena kada ne radi ukoliko ima dijete sa težim smetnjama u razvoju kod kojeg je nalazom nadležne ljekarske komisije utvrđen stepen invalidnosti najmanje 80% najduže do 18. godine života djeteta.

Naknada plaće iz stava 1. ovog člana se ostvaruje u iznosu najniže federalne plaće.

Pravo iz čl. 153. i 153 a. ovog zakona ne može se ostvariti ukoliko je dijete smješteno u ustanovu socijalne zaštite ili instituciju u koju se vrši smještaj u skladu sa ovim zakonom ili hraniteljsku porodicu.

Član 153 b.

Jedan od roditelja kojem je u skladu sa propisima o radu odobren rad sa polovinom punog radnog vremena nema pravo na naknadu plaće za polovinu radnog vremena kad ne radi ukoliko:

- se roditelju u skladu sa zaključenim kolektivnim ugovorom ili unutrašnjim općim aktom ili ugovorom o radu poslodavac isplaćuje puni iznos plaće ili naknadu plaće za polovinu punog radnog vremena kad ne radi;
- drugi roditelj radi polovinu punog radnog vremena i ostvaruje naknadu plaće za polovinu punog radnog vremena kad ne radi;
- je dijete smješteno u ustanovu socijalne zaštite ili instituciju u koju se vrši smještaj u skladu sa ovim zakonom i hraniteljsku porodicu;
- drugi roditelj ima status roditelja njegovatelja."

Član 36.

U članu 155. riječi: "dodatnu pomoć na ime brige i njege djeteta" zamjenjuju se riječima: "porodiljski dodatak".

Član 37.

U članu 156. u stavu 1. riječi: "dodatnu pomoć na ime brige i njege djeteta" zamjenjuju se riječima: "porodiljski dodatak".

U stavu 2. riječi: "dodatnu pomoć na ime brige i njege djeteta" zamjenjuju se riječima: "porodiljski dodatak".

Iza stava 2. dodaje se novi stav 3. koji glasi:

"Pravo na porodiljski dodatak ne može ostvariti nezaposlena porodilja, ukoliko je dijete smješteno u ustanovu socijalne zaštite ili instituciju u koju se smještaju korisnici u skladu sa ovim zakonom ili hraniteljsku porodicu."

U dosadašnjem stavu 3. koji postaje stav 4. riječi: "dodatna pomoć na ime brige i njege djeteta" zamjenjuju se riječima: "porodiljski dodatak".

Član 38.

Član 157. mijenja se i glasi:

"Član 157.

Iznos prava na porodiljski dodatak koji ostvaruje nezaposlena porodilja ne može biti manji, odnosno veći od razlike ukupnog iznosa i iznosa novčane pomoći nezaposlenoj porodilji koji je ostvaren u skladu sa Zakonom o materijalnoj podršci."

Član 39.

U članu 159. u stavu 1. riječi: "dodatnu pomoć na ime brige i njege djeteta" zamjenju se riječima: "porodiljski dodatak", a riječi: "dodatne pomoći na ime brige i njege djeteta" zamjenju se riječima: "porodiljskog dodatka".

U stavu 2. riječi: "dodatnu pomoć na ime brige i njege djeteta" zamjenjuju se riječima: "porodiljski dodatak".

Član 40.

U članu 159 a. riječi: “dodatnu pomoć na ime brige i njege djeteta” zamjenju se riječima: “porodiljski dodatak”.

Član 41.

U članu 167. stav 2 iza riječi: “u kojem je zahtjev podnesen” dodaje se interpunkcijski znak: “zarež” i riječi: “ili od dana ispunjavanja propisanih uslova u mjesecu u kojem je zahtjev podnesen”.

Član 42.

U članu 170. u alineji 15. riječi: “dodatna pomoć na ime brige i njege djeteta” zamjenju se riječima: “porodiljski dodatak”.

Član 43.

U članu 171 a. u stavu 2. iza riječi: "upisuju u evidenciju" dodaje se interpunkcijski znak "zarež" i riječi: "zaštita ličnih podataka".

Član 44.

U članu 173. stav 1. tačka 4) iza riječi: "na smještaj" dodaju se riječi: "ili prihvat".

Tačka 5) mijenja se i glasi:

"5) otpusti korisnika koji je smješten ili prihvaćen, a da korisnik nema obezbijeđen drugi oblik zbrinjavanja ili socijalne zaštite,"

Iza tačke 5) dodaju se nove tač. 6) i 7) koje glase:

"6) ako prioritetno ne primi na savjetovanje lice koja uputi organ starateljstva, a po osnovu postupka koje vodi organ starateljstva u konkretnom predmetu,

7) smjesti korisnika u ustanove socijalne zaštite protivno odredbama ovog zakona"

Dosadašnje tač. 6), 7), 8) i 9) postaju tač. 8), 9), 10) i 11).”

Prelazna odredba

Član 45.

Prvostepeni organi su dužni po službenoj dužnosti uskladiti sa ovim zakonom postojeća rješenja kojima se ostvaruju prava koja su predmet ovog zakona u roku od 90 dana od dana stupanja na snagu ovog zakona i donijeti rješenja o prestanku prava, odnosno ostvarivanju prava iz ovog zakona.

Ministar će u roku od šest mjeseci od dana stupanja na snagu ovog zakona donijeti pravilnik iz člana 124. stav 3. ovog zakona.

Postupci koji su pokrenuti prije stupanja na snagu ovog zakona, a nisu okončani, okončaće se po odredbama ovog zakona.

Član 46.

Osnivački i opći akti ustanova socijalne zaštite uskladit će se sa članom 68. stav 4. ovog zakona u roku od 90 dana od dana stupanja na snagu ovog zakona.

Član 47.

Ovlašćuje se Zakonodavno-pravna komisija Skupštine Kantona Sarajevo da utvrdi Novi prečišćeni tekst Zakona o socijalnoj zaštiti, zaštiti civilnih žrtava rata i zaštiti porodice sa djecom.

Član 48.

Ovaj zakon stupa na snagu narednog dana od dana objavljivanja u "Službenim novinama Kantona Sarajevo".

Broj: 13-05/1-02-13593/24

Sarajevo,

2024.godine

**PREDSJEDAVAJUĆI
SKUPŠTINE KANTONA SARAJEVO**

Elvedin Okerić

O B R A Z L O Ž E N J E

I – PRAVNI OSNOV ZA DONOŠENJE ZAKONA

Pravni osnov za donošenje ovog zakona sadržan je u:

- čl. 13.e) i 18.b) Ustava Kantona Sarajevo ("Službene novine Kantona Sarajevo", br. 1/96, 2/96-Ispravka, 3/96-Ispravka, 16/97, 14/00, 4/01, 28/04, 6/13 i 31/17) kojim je propisano da federalna vlast i Kanton Sarajevo imaju zajedničke nadležnosti za oblast socijalne politike, s tim da Kanton Sarajevo razrađuje institute i finansira ono što je federalnim propisom okvirno utvrđeno,

- članu 8. Zakona o osnovama socijalne zaštite, zaštite civilnih žrtava rata i zaštite porodice sa djecom ("Službene novine Federacije BiH", br. 36/99, 54/04, 39/06, 14/09, 45/16, 40/18 i 16/23) kojim je propisano da nadležna tijela kantona uređuju djelatnost socijalne zaštite, zaštite civilnih žrtava rata i zaštite porodice sa djecom.

-članu 4. Zakona o zaštiti civilnih žrtava rata u Federaciji Bosne i Hercegovine ("Službene novine Federacije Bosne i Hercegovine", broj: 60/23) koji propisuje da kantoni u skladu sa svojim mogućnostima i potrebama civilnih žrtava rata utvrđuju, osiguravaju i proširuju obim utvrđenih prava ovim zakonom.

II – RAZLOZI ZA DONOŠENJE ZAKONA

Ministarstvo za rad, socijalnu politiku, raseljena lica i izbjeglice Kantona Sarajevo (u daljem tekstu: Ministarstvo) je cijeneći odredbe Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", br. 38/14-Prečišćeni tekst, 38/16, 44/17, 28/18, 52/21 i 40/22) (u daljem tekstu: Kantonalni zakon) i analizirajuće iste kroz dosadašnju primjenu, te imajući u vidu da zbog obaveze usklađivanja ovog zakona 2022. godine sa Zakonom o materijalnoj podršci porodicama s djecom u Federaciji Bosne i Hercegovine ("Službene novine Federacije Bosne i Hercegovine", broj: 52/22) i kratkoće vremena za usklađivanje sa federalnim zakonom, nije mogla provesti javna rasprava, smatralo da je neophodno da se krene sa aktivnostima u cilju predlaganja Skupštini Kantona Sarajevo Nacrta Zakona o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom u cilju normativne veće jasnosti zakona što će omogućiti prvostepenim organima lakšu primjenu Zakona.

Ministarstvo je je imalo i cilj da se iznosi naknada za pojedina prava iz oblasti socijalne zaštite uvećaju i na taj način doprinese boljem položaju socijalno ugroženih kategorija, te stvaranje zakonskih pretpostavki da ustanove socijalne zaštite čiji je osnivač Kanton Sarajevo mogu usmjeriti svoje aktivnosti na prevenciju institucionalizacije i deinstitucionalizaciju.

Takođe, osnovna načela kojima se Ministarstvo rukovalo pri izradi Nacrta Zakona je bilo načelo humanizma i građanske solidarnosti u cilju uklanjanja, odnsono smanjivanja posljedica izazvanih uzrocima koji dovode do stanja socijalne potrebe, te zaštita porodice i djece.

Nacrtom zakona je takođe trebalo izvršiti i neka nomotehnička poboljšanja zakona.

Iz tog razloga ministrica za rad, socijalnu politiku, raseljena lica i izbjeglice Kantona Sarajevo imenovala je Radnu grupu, koja je na temelju naprijed navedenog imala zadatak da u okviru propisanih ustavnih nadležnosti Kantona Sarajevo, razmotri izmjene i dopune Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", br. 38/14 – Prečišćeni tekst, 38/16, 44/17, 28/18, 52/21 i 40/22), te predloži Nacrt zakona o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom.

Jedan član ove radne grupe imenovan je iz reda zaposlenika Javne ustanove "Kantonalni centar za socijalni rad" (u daljem tekstu: Kantonalni centar), jedan član je u skladu sa saglasnosti dobijenom od strane Saveza općina i gradova u Federaciji Bosne i Hercegovine imenovan iz reda državnih službenika Općine Novi Grad kao predstavnik općina u Kantonu Sarajevo.

Kao ulazne informacije, a u cilju izvršavanja definisanog zadatka, Radna grupa je koristila pisane prijedloge općinskih službi socijalne zaštite, prijedloge date od predstavnika lokalne samouprave, tabelarne prikaze kretanja broja korisnika od 2018. godine do 2023. godine za oblast socijalne zaštite i zaštite porodice sa djecom, te informacije sa kojim raspolaže Ministarstvo (raspoloživa budžetska sredstva, razlozi podnošenja žalbi i sl).

Imajući u vidu dostupne informacije i neophodnost da se pojedine zakonske odredbe izmijene ili dopune, na temelju prijedloga Radne grupe Ministarstvo je pripremlilo Nacrt Zakona o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom.

Cijeneci da je Ministarstvo za ljudska prava i izbjeglice Bosne i Hercegovine donijelo Pravilnik o načinu ostvarivanja prava na socijalnu pomoć licima kojima je priznata međunarodna zaštita u Bosni i Hercegovini ("Službeni glasnik Bosne i Hercegovine", broj: 43/17), postojala je potreba da se Nacrtom zakona uredi da lica kojima je priznata međunarodna zaštita ova prava ne mogu ostvariti još jednom kroz ovaj zakon, jer ih već ostvaruju navedenim Pravilnikom.

Budući da se za korisnike stalne novčane pomoći smještenim u ustanove socijalne zaštite, druge institucija i hraniteljsku porodice, smještaj plaća i iz naknade stalne pomoći, kako se ne bi stvarali dodatni bespotrebni finansijski troškovi prilikom preusmjeravanja naknade stalne novčane pomoći na ustanove socijalne zaštite, druge institucija i hraniteljsku porodice, predloženo je da pravo na stalnu novčanu pomoć ne mogu ostvariti osobe koje su smještene u ustanove socijalne zaštite i institucije u koje se smještaju korisnici ili hraniteljske porodice. Budući da se radi o osobama u stanju socijalne potrebe, zdravstvena zaštita je osigurana kroz Zakon o socijalnoj zaštiti, zaštiti civilnih žrtava rata i zaštiti porodice sa djecom.

U Nacrtu Zakona, smatrajući da je i pored uvećanja iznosa naknade na ime stalne novčane pomoći u izmjenama i dopunama Zakona u 2021. godini, ovaj iznos i dalje nizak, utvrđeno je da se on povećava, a samim tim se uvećava i census prihoda kao uslov za ostvarivanje ovog prava.

Takođe su izvršene izmjene u dijelu uvećanja iznosa naknada za jednokratnu i izuzetnu novčanu pomoć koje ostvaruju osobe koje se iz raznih razloga nađu u stanju socijalne potrebe, te je iznos jednokratne novčane pomoći uvećan kao i iznos izuzetne novčane pomoći.

Izvršene su izmjene koje se odnose na pravo na ostvarivanje naknade za vrijeme čekanja za zaposlenje koje ostvaruju osobe, odnosno djeca ometena u psihofizičkom razvoju koja su osposobljena za život i rad i predviđeno je uvećanje ove naknade.

Ovim izmjenama je predloženo povoljnije zakonsko rješenje koje se odnosi na osobe koje su osposobljene za život i rad i po tom osnovu ostvaruju pravo na novčanu naknadu za vrijeme čekanja na zaposlenje, na način da je regulisano da ove osobe mogu ponovo ostvariti ovu naknadu i u slučaju da su posao izgubile svojom krivicom, a nakon što iskoriste prava po osnovu propisa iz radnog zakonodavstva.

Predloženo je i da ukoliko se ovim licima u potpunosti oduzme poslovna sposobnost prestaje pravo na novčanu naknadu za vrijeme čekanja na zaposlenje. Činjenica je da ova lica nakon potpunog gubitka poslovne sposobnosti ne mogu zaključiti ugovor o radu sa poslodavcem, te ne postoji pravni osnov da se ove osobe vode u evidenciji nezaposlenih u Javnoj ustanovi "Služba za zapošljavanje Kantona Sarajevo" Sarajevo i kao nezaposlene osobe ostvaruju naknadu za vrijeme čekanja na zaposlenje.

Značajno je istaći da je u Nacrtu Zakona utvrđena izmjena načina obračuna censusa prihoda na osnovu kojih stare i nemoćne osobe (preko 65 godina), odnosno penzionerske porodice ostvaruju pravo na novčanu naknadu za pomoć i njegu od strane druge osobe. Naime, census prihoda za ovo pravo je bio vezan za prosječnu kantonalnu plaću, koja nije pratila uvećanje iznosa penzije, tako da su ove osobe, najvećim dijelom penzionerska domaćinstva sa dva člana iz ovog razloga ostajali bez ovog prava, bez obzira što su imajući u vidu njihovo zdravstveno stanje prema nalazima nadležnih ljekarskih komisija ispunjavali uslove za ovo pravo. Da bi se ovo izbjeglo, Nacrtom Zakona je utvrđeno da se census prihoda vezuje za 60% najniže penzije u Federaciji Bosne i Hercegovine.

Takođe je pravo na kućnu njegu i pomoć u kući, kao organizirano pružanje raznih vrsta usluge, kao što su prehrana, obavljanje kućnih i drugih poslova održavanja kuće, održavanje lične higijene i pružanje drugih svakodnevnih potreba u kući, uređeno na način da je postupak ostvarivanja ovog prava sada jasno propisan, odnosno ovo pravo se ostvaruje putem rješenja JU "Kantonalni centar", a na osnovu nalazi nadležne ljekarske komisije, kao i ugovorom između korisnika i pružaoca ove usluge. Pravo ostvaruju osobe koje imaju osigurane boravišne i druge životne uslove u okruženju gdje žive, ali zbog starosti, promjena u zdravstvenom stanju ili utvrđenog invaliditeta ne mogu voditi brigu o sebi, niti im članovi porodice mogu pružiti tu brigu, a usluge mogu pružati ustanove i nevladine organizacije registrirane za pružanje usluge kućne njege i pomoći u kući sa kojima Centar svake godine zaključi sporazum o pružanju usluge kućne njege i pomoći u kući kojim se reguliše način pružanja ove usluge, cijena usluge kućne njege i pomoć u kući i druga bitna pitanja.

Pošto bi pravo na ovu uslugu najviše koristile najviše osobe starije dobi to se i census prihoda kao uslova za ostvarivanje ovog prava veže za najnižu penziju u Federaciji BiH.

Prema Nacrtu zakona ustanove socijalne zaštite mogu u okviru svoje djelatnosti organizovati i implementirati usluge koje su usmjerene na prevenciju institucionalizacije i deinstitutionalizaciju korisnika, te pružati i druge usluge u cilju pružanja pomoći licima u stanju socijalne potrebe. Na ovaj način se stvara zakonska pretpostavka za transformaciju ustanova u pogledu rada sa korisnicima i njihovog smještaja u ustanove.

Izvršene su nomotehničke izmjene kada je u pitanju naziv ustanova i naziv Javne ustanove "Porodično savjetovalište", te je kod ove ustanove predviđeno da je obavezno prioritarno primiti na savjetovanje lice koje uputi organ starateljstva, odnosno Kantonalni centar.

Prava civilnih žrtava rata se ostvaruju na osnovu Zakona o zaštiti civilnih žrtava rata u Federaciji Bosne i Hercegovine ("Službene novine Federacije Bosne i Hercegovine", broj: 60/23) propisala osnovna prava koja ostvaruju civilne žrtve rata, ali je ostavila mogućnost kantonima da propišu i druga prava. Ovo ministarstvo je smatralo da je neophodno da se iz budžetskih sredstava finansiraju troškovi banjskog liječenja za civilne žrtve rata koje su ostvarile pravo na ličnu invalidninu, dodatak za njegu i pomoć od strane druge osobe i ortopedski dodatak. Postupak, uslovi i način ostvarivanja ovog prava urediće se pravilnikom koji će donijeti ministrica .

Predloženo je u Nacrtu zakona da se izmijeni formulacija da dodatak na djecu ostvaruje dijete bez jednog ili oba roditelja, već se definiše da ovo pravo može ostvariti dijete kojem jedan ili oba roditelja nisu živi ili jedan od roditelja nije upisan u rodni list.

Vezano za ostvarivanje prava na dodatak na djecu, odnosno uvećani dodatak na djecu za kategorije djece iz važećeg zakona, precizirano je da ovo pravo može ostvariti dijete najduže do 27. godine života ukoliko se redovno školuje. Takođe su izjednačeni uslovi u pogledu ispunjavanja uslova prestanka prava na dodatak na djecu i dječiji dodatak za vrijeme studiranja, a predviđeno je i da se ova dva prava ostvaruju samo ukoliko djeca redovno studiraju u Bosni i Hercegovini.

Ostale odredbe koje se odnose na dječiji dodatak za vrijeme studiranja nisu mijenjani.

U Nacrtu Zakona je propisano i da ostvarivanje prava na dodatak na djecu ne isključuje mogućnost ostvarivanja i prava na dječiji dodatak, budući da se radi o ranjivim kategorijama djece (djeca bez roditelja, djeca čiji su roditelji osobe sa invaliditetom ili su sama djeca osobe sa invaliditetom, djeca oboljela od težih bolesti, korisnici stalne novčane pomoći).

Dodatak na djecu usklađen je sa odredbama Zakona o materijalnoj podršci i u dijelu prestanka ovog prava, odnosno propisano je da ovo pravo prestaje smještajem djeteta u ustanovu socijalne zaštite ili instituciju u koju se vrši smještaj po odredbama ovog zakona kao i u hraniteljsku porodicu.

Isto je učinjeno i kada je u pitanju ostvarivanje prava na porodijsku naknadu koju ostvaruju porodilje, te je propisano da se ovo pravo ne može ostvariti ukoliko je dijete smješteno u ustanovu socijalne zaštite ili instituciju u koju se vrši smještaj po odredbama ovog zakona kao i u hraniteljsku porodicu.

Kroz analizu primjene Zakona o socijalnoj zaštiti, zaštiti civilnih žrtava rata i zaštiti porodice sa djecom zaključeno je da je neophodno da se odredbe zakona na osnovu kojih porodilje u radnom odnosu ostvaruju prava iz radnog odnosa izmjene i da se prava porodilja u radnom odnosu definišu na način da zakonske odredbe budu jasnije. Kroz dosadašnju primjenu ovog zakona bilo je vidljivo da neki opštinski organi uprave imaju problema prilikom primjene odredbi koje se odnose na

ostvarivanje prava porodilja u radnom odnosu, odnosno da im nije bio jasan način izračunavanja dodatne pomoći na ime brige i njege djeteta.

Cijeneći dakle da je neophodno u ovom dijelu zakonske odredbe pojednostaviti i precizirati u Nacrtu zakona se definisalo da porodilje u radnom odnosu ostvaruju dva prava i to, novčanu naknadu umjesto plaće i porodiljski dodatak. Naziv prava na dodatnu pomoć na ime brige i njege djeteta zamijenjen je sa nazivom prava na porodiljski dodatak kako bi se izbjeglo da naziv prava asocira na pravo koje ostvaruje dijete, jer se radi o dodatnom pravu porodilje. Kada su u pitanju porodilje u radnom odnosu uslovi za ostvarivanje prava su ostali neizmjenjeni.

Nacrtom zakona su prava za zaposlene porodilje (naknada umjesto plaće i porodiljski dodatak) i dalje vezana za prosječnu plaću u Federaciji Bosne i Hercegovine za prethodnu godinu koja se utvrđuje na osnovu posljednjeg statističkog podatka Federalnog zavoda za statistiku za prethodnu godinu.

U Nacrtu Zakona, za porodilje koje imaju manje od 12 mjeseci prije odlaska na porodiljsko odsustvo zaključen ugovor o radu ili rješenje o zasnivanju radnog odnosa i prijavu na obavezno osiguranje po osnovu radnog odnosa, predloženo je da se novčana naknada umjesto plaće sa 30% prosječne kantonalne plaće koliko je trenutno propisano, poveća na iznos od 50% najniže federalne plaće.

U cilju preciziranja i jasnosti izračunavanja i utvrđivanja prava na novčanu naknadu umjesto plaće i porodiljskog dodatka član 150 a. važećeg zakona je preformulisan na način da se naprijed navedeno umjesto sa dosadašnja dva stava sada uređuje sa šest stavova. Na ovaj način je definisana svaka situacija koja utiče na utvrđivanje i izračunavanje novčanih iznosa ovih prava.

Prema ovom članu, žena – majka u radnom odnosu može ostvariti pravo na porodiljski dodatak ukoliko je ostvarila naknadu plaće koja je manja od prosječne plaće u Federaciji Bosne i Hercegovine za prethodnu godinu.

Ukoliko žena - majka u radnom odnosu ostvari naknadu plaće isključivo po osnovu člana 149. stav 1. ovog zakona porodiljski dodatak iznosi novčanu razliku od najniže federalne plaće do prosječne plaće u Federaciji Bosne i Hercegovine za prethodnu godinu.

Ukoliko žena - majka u radnom odnosu ostvari naknadu plaće isključivo po osnovu člana 149. stav 2. ovog zakona porodiljski dodatak iznosi novčanu razliku od 50% najniže federalne plaće do prosječne plaće u Federaciji Bosne i Hercegovine za prethodnu godinu.

Ukoliko žena - majka u radnom odnosu kod poslodavca ostvari naknadu plaće u cjelosti, a taj iznos je manji od ukupnog iznosa, žena – majka u radnom odnosu ima pravo na porodiljski dodatak u iznosu novčane razlike od naknade plaće koju je ostvarila kod poslodavca do prosječne plaće u Federaciji Bosne i Hercegovine za prethodnu godinu.

Ukoliko poslodavac isplaćuje ženi – majci u radnom odnosu razliku naknade plaće od iznosa novčane naknade plaće po ovom zakonu do prosječne plaće u Federaciji Bosne i Hercegovine za prethodnu godinu i više, žena majka u radnom odnosu nema prava na porodiljski dodatak.

Ukoliko poslodavac isplaćuje ženi – majci u radnom odnosu razliku od prosječne plaće u Federaciji Bosne i Hercegovine za prethodnu godinu do iznosa njene plaće, žena – majka ima pravo na naknadu plaće i porodiljski dodatak u punom iznosu.

Razmotrena je i potreba regulisanja ostvarivanja prava na naknadu plaće roditelja koji u skladu sa propisima o radu rade pola punog radnog vremena i u skladu sa Zakonom o radu imaju pravo na naknadu plaće za pola punog radnog vremena kad ne rade. Zakonska odredba koja je trenutno u primjeni omogućavala je roditelju da u ovim situacijama ostvaruje pravo na naknadu plaće i dodatnu pomoć na ime brige i njege djeteta najduže do tri godine života djeteta. Smatralo se da u situacijama kada roditelj radi pola punog radnog vremena u skladu sa odredbama Zakona o radu, pravo na naknadu plaće ne proizilazi iz porodiljskog odsustva već iz radno-pravnog odnosa, te je neophodno propisati da roditelj u slučajevima kada ne radi pola punog radnog vremena ostvaruje za taj period naknadu plaće u iznosu najniže federalne plaće, bez ostvarivanja porodiljskog dodatka. Nacrtom zakona je predviđeno, u skladu sa propisima o radu, da roditelj može pravo na naknadu plaće za polovinu radnog vremena kad ne radi ostvariti:

-za blizance, treće i svako sljedeće dijete, najduže do dvije godine života djeteta,

-za pojačanu brigu i njegu djeteta, prema nalazu nadležne zdravstvene ustanove, najduže do tri godine života djeteta.

Nacrtom zakona je takođe predviđeno da roditelj za rad sa polovinom punog radnog vremena kad ne radi, u slučaju predviđenom članom 68. Zakona o radu Federacije BiH, ima pravo na naknadu plaće za ovaj period. Zakon o socijalnoj zaštiti, zaštiti civilnih žrtava rata i zaštiti porodice sa djecom ovu situaciju normativno nije uredio. Stoga je predloženo da ukoliko roditelj radi polovinu punog radnog vremena, jer ima dijete sa težim smetnjama u razvoju kod kojeg je nalazom nadležne ljekarske komisije utvrđen stepen invalidnosti najmanje 80%, ima pravo na naknadu plaće u visini najniže federalne plaće do 18. godine života djeteta. Predloženo je da se dobna granica do koje roditelj ostvaruje ovo pravo veže za godine punoljetstva djeteta.

Predloženo je i da se naknada plaće za pola radnog vremena kad roditelj ne radi ne može ostvariti ukoliko je dijete smješteno u ustanovu socijalne zaštite ili neku drugu instituciju u koju se vrši smještaj. Nacrtom zakona predviđeno je i da roditelj ne može ostvariti ovo pravo ako se roditelju u skladu sa zaključenim kolektivnim ugovorom ili unutrašnjim opštim aktom ili ugovorom isplaćuje puni iznos plaće ili naknada plaće za polovinu punog radnog vremena, kada drugi roditelj radi polovinu punog radnog vremena, a ostvaruje naknadu plaće za polovinu punog radnog vremena kad ne radi, te u slučajevima kada drugi roditelj ima status roditelja njegovatelja.

Kada je u pitanju plaćanje poreza i doprinosa za ove porodilje, oni će se plaćati u skladu sa važećim propisima koji regulišu ovu materiju.

Što se tiče nezaposlenih porodilja, Nacrtom zakona nisu predložene nikakve izmjene i dopune budući da nezaposlene porodilje pravo na novčanu pomoć ostvaruju u skladu sa Zakonom o materijalnoj podršci porodicama s djecom u Federaciji Bosne i Hercegovine ("Službene novine Federacije Bosne i Hercegovine", broj: 52/22), dok u skladu sa kantonalnim Zakonom ostvaruju pravo na porodiljski dodatak kao i porodilje u radnom odnosu. U zakonu je precizirano da porodiljski dodatak ne može biti manji, odnosno veći od razlike prosječne plaće u Federaciji Bosne i Hercegovine za prethodnu godinu i iznosa novčane pomoći nezaposlenoj porodilji koji je ostvaren u skladu sa Zakonom o materijalnoj podršci.

Budući da nije bila normirana situacija kada je podnesen zahtjev za ostvarivanje prava porodilja, a u tom momentu nisu bili ispunjeni uslovi za ostvarivanje ovih prava (npr. prebivalište ili državljanstvo), predviđeno je da ova prava teku od dana ispunjavanja propisanih uslova, a nakon podnošenja zahtjeva.

Kako se naziv prava dodatna pomoć na ime brige i njege djeteta promijenio u porodiljski dodatak, to je izvršena izmjena naziva ovih prava u čitavom zakonu.

Na kraju u Nacrtu zakona su kaznene odredbe dopunjene kako bi se pojačala odgovornost kod ustanova kada je u pitanju prijem i otpust korisnika iz ustanove.

Postupci koji su pokrenuti prije stupanja na snagu ovog zakona, a nisu okončani, okončaće se po odredbama ovog Zakona, a općinski organi uprave su dužni da u roku od 90 dana od dana stupanja na snagu ovog Zakona usklade donesena rješenja sa ovim zakonom.

Propisano je da će ministar u roku od šest mjeseci od dana stupanja na snagu ovog zakona donijeti pravilnik vezano za banjsko liječenje i da će se osnivački i opći akti ustanova socijalne zaštite uskladiti sa Nacrtom zakona u roku od 90 dana od dana stupanja na snagu ovog zakona, dok Zakon stupa na snagu narednog dana od dana objavljivanja u "Službenim novinama Kantona Sarajevo".

Nacrt zakona je dostavljen Ekonomsko-socijalnom vijeću za područje Kantona Sarajevo koje je Zaključkom broj: 13-04-28403-1/23 od 20.06.2023. godine podržalo aktivnosti ovog ministarstva na donošenju Nacrta zakona.

Nakon što je Vlada Kantona Sarajevo Zaključkom broj: 02-04-33995-2/23 od 27.07.2023. godine utvrdila tekst Nacrta Zakona o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom, te upućen prema Skupštini Kantona Sarajevo, Zaključkom Vlade Kantona Sarajevo broj: 02-04-1334-32.3/24 od 18.01.2024. godine je vraćen Ministarstvu na doradu, te je Ministarstvo Nacrt Zakona doradilo u dijelu uređenja prava na kućnu njegu i pomoć i pomoć u kući, utvrđivanja hitnosti donošenja rješenja o smještaju korisnika od strane Službe socijalne zaštite, utvrđivanja novčane kazne za ustanove ukoliko se osoba smjesti protivno odredbama Zakona o socijalnoj zaštiti, zaštiti civilnih žrtava rata i zaštiti porodice sa djecom, te utvrđivanja naknade umjesto plaće za porodilje u radnom odnosu u iznosu prosječne plaće u Federaciji BiH.

III- OBRAZLOŽENJE PREDLOŽENIH PRAVNIH RJEŠENJA

Član 1. Ovim članom propisano je da izuzetno od stava 1. člana 6., strani državljanin kojem je priznata međunarodna zaštita u Bosni i Hercegovini, prava iz ovog zakona ostvaruje u skladu sa propisom nadležnog organa Bosne i Hercegovine kojim se uređuje način ostvarivanja prava na socijalnu pomoć licima kojima je priznata međunarodna zaštita u Bosni i Hercegovini.

Član 2. Ovim članom propisano je da su Službe socijalne zaštite dužne po službenoj dužnosti vršiti provjeru svih predmeta smještaja u ustanove socijalne zaštite i institucije u koje se smještaju korisnici u skladu sa ovim zakonom, najmanje jednom u dvanaest mjeseci počevši od donošenja rješenja.

Član 3. Ovim članom u članu 18. stav 1. broj: "30" zamjenjuje se brojem: "40", te se na ovaj način povećava census prihoda za kao uslov za ostvarivanje stalne novčane pomoći i iznos stalne novčane pomoći.

Član 4. Ovim članom novi stav 2. propisuje da pravo na stalnu novčanu pomoć ne mogu ostvariti osobe koje su smještene u ustanove socijalne zaštite ili institucije u koje se smještaju korisnici u skladu sa ovim zakonom ili hraniteljske porodice.

Član 5. Ovim članom propisano je da se u članu 24. iza riječi: "pomoći" brišu se riječi: "i osobama smještenim u ustanove socijalne zaštite.

Član 6. Ovim članom propisano je da se u članu 27. stav 1. riječi: "iznos 40% prosječne plaće" zamjenjuje se riječima: "iznos 60 % najniže penzije u Federaciji Bosne i Hercegovine utvrđene za mjesec u kojem je podnesen zahtjev za ostvarivanje prava na novčanu naknadu za pomoć i njegu od strane druge osobe".

Iza stava 1. dodaje se novi stav 2. koji glasi:

"Centar će za svaki mjesec u kalendarskoj godini od Federalnog zavoda PIO/MIO pribaviti dokaz o iznosu najniže penzije iz stava 1. ovog člana."

Dosadašnji st. 2. i 3. postaju st. 3. i 4..

Na ovaj način se census prihoda kao uslov za ostvarivanje prava na novčanu naknadu za pomoć i njegu od strane druge osobe za stare i nemoćne osobe vezuje za najnižu penziju u Federaciji Bosne i Hercegovine.

Član 7. Ovim članom propisano je da se u članu 30. broj: "20" zamjenjuje se brojem: "30" i time se uvećava iznos jednokratne novčane pomoći.

Član 8. Ovim članom propisano je da se u članu 34. broj: "40" zamjenjuje se brojem: "90" i time se uvećava iznos izuzetne novčane pomoći.

Član 9. Ovim članom propisano je da se u članu 42. stav 3. broj: "20" zamjenjuje se brojem: "30" i time se uvećava iznos novčane naknade za vrijeme čekanja na zaposlenje osobama koje su osposobljene za život i rad.

Član 10. Ovim članom propisano je da pravo na novčanu naknadu za vrijeme čekanja na zaposlenje prestaje ako se korisniku – osobi koja je osposobljena za život i rad, oduzme u potpunosti poslovna sposobnost.

Član 11. Ovim članom propisano je da osoba koja je osposobljena za život i rad može ponovo ostvariti pravo na naknadu za vrijeme čekanja na zaposlenje i ako izgubi posao svojom krivicom.

Član 12. Ovim članom u članu 57. iza stava 1. dodaje se novi stav 2. koji propisuje da izuzetno, ukoliko se korisnik smješta u ustanovu socijalne zaštite u neradne dane ili u noćnim satima, Služba rješenje donosi prvog narednog radnog dana i istog dana dostavlja ustanovi socijalne zaštite, odnosno korisniku ili ovlaštenoj osobi. Stav 2. postaje stav 3..

Član 13. Ovim članom u članu 58 b. stav 1. iza riječi: "kapaciteta ustanove" dodaje se interpunkcijski znak: "zarež" i riječi: "izuzev Javne ustanove Terapijska zajednica – Kampus Kantona Sarajevo u koju se može smještati najviše do 10% kapaciteta ustanove".

Član 14. Ovim članom član 59. mijenja se i definiše kućna njega i pomoć u kući kao organizirano pružanje raznih vrsta usluge, kao što su: prehrana, obavljanje kućnih i drugih poslova održavanja kuće, održavanje lične higijene i pružanje drugih svakodnevnih potreba u kući osobama koje imaju osigurane boravišne i druge životne uslove u okruženju gdje žive, ali zbog starosti, promjena u zdravstvenom stanju ili utvrđenog invaliditeta ne mogu voditi brigu o sebi, niti im članovi porodice mogu pružiti tu brigu.

Usluge kućne njege i pomoći mogu pružati ustanove, nevladine organizacije i druge pravne osobe registrirane za pružanje usluge kućne njege i pomoći u kući sa kojima Centar svake godine zaključuje sporazum o pružanju usluge kućne njege i pomoći u kući kojim se reguliše način pružanja ove usluge, cijena usluge kućne njege i pomoć u kući i druga bitna pitanja.

Član 15. Ovim članom član 60. se mijenja i definiše da osobe iz člana 60. stav 1. ovog zakona ostvaruju pravo na kućnu njegu i pomoć u kući pod uslovom da im ukupan prihod po članu domaćinstva, u koji ne ulazi prihod iz člana 9. stav 1. tačka 6. ovog Zakona mjesečno ne prelazi iznos:

- najniže penzije u Federaciji Bosne i Hercegovine utvrđene za mjesec u kojem je podnesen zahtjev za ostvarivanje prava na novčanu naknadu za pomoć i njegu od strane druge osobe, ukoliko se radi o jednočlanom domaćinstvu;

- 60 % najniže penzije u Federaciji Bosne i Hercegovine utvrđene za mjesec u kojem je podnesen zahtjev za ostvarivanje prava na novčanu naknadu za pomoć i njegu od strane druge osobe, ukoliko se radi o višečlanom domaćinstvu.

Pravo na kućnu njegu i pomoć u kući ostvaruje se pod uslovom da osoba iz člana 60. stav 1. ovog zakona ne ostvaruje pravo na novčanu naknadu za pomoć i njegu od strane druge osobe po ovom zakonu ili dodatak za njegu i pomoć od druge osobe po Federalnom zakonu. Centar će za svaki mjesec u kalendarskoj godini od Federalnog zavoda PIO/MIO pribaviti dokaz o iznosu najniže penzije iz stava 1. ovog člana.

Član 16. Ovim članom mijenja se član 61. i definiše da potrebu za pružanje usluge kućne njege i pomoć u kući nalazom i mišljenjem utvrđuje u prvom stepenu prvostepena ljekarska komisija Stručne institucije, a u drugom stepenu po žalbi drugostepena ljekarska komisija Stručne institucije."

Član 17. Ovim članom mijenja se član 62. i definiše da se pravo na uslugu kućne njege i pomoć u kući ostvaruje rješenjem Službe ili zaključivanjem privatnih ugovora o pružanju usluge kućne njege i pomoć u kući između korisnika ove usluge ili ovlaštene osobe i pružaoca ove usluge.

Rješenjem Službe ili ugovorom iz stava 2. ovog člana utvrđuje se broj usluga kućne njege i pomoći u kući u jednom mjesecu u skladu sa nalazom nadležnih ljekarskih komisija iz člana 61. ovog zakona.

Član 18. Cijena usluge kućne njege i pomoć u kući koja se pruža na osnovu rješenja Službe utvrđuje se početkom svake kalendarske godine aktom Vlade Kantona Sarajevo.

Cijenu usluge kućne njege i pomoć u kući koja se pruža na osnovu privatnih ugovora utvrđuje ustanova, nevladina organizacija ili druga pravna osoba iz člana 59. stav 2. ovog zakona.

Član 19. Ovim članom propisano je da se u članu 68. stav 1. iza riječi: “ustanove” dodaju riječi: “socijalne zaštite”, a iza stava 3. dodaje se novi stav 4. koji glasi: “Ustanove mogu u okviru svoje djelatnosti organizovati i implementirati usluge koje su usmjerene na prevenciju institucionalizacije i deinstitutionalizaciju korisnika, kao i druge usluge u cilju pružanja pomoći licima u stanju socijalne potrebe.”

Član 20. Ovim članom propisano je da se riječ "savjetovališta" zamjenjuje riječima: "Porodičnog savjetovališta (u daljem tekstu: Savjetovalište)", što je bila jedna nomotehnička izmjena. Propisano je i da je Porodično savjetovalište obavezno prioritetno primiti na savjetovanje lice koje uputi organ starateljstva, a po osnovu postupka koji vodi organ starateljstva u konkretnom predmetu.

Član 21. Ovim članom propisano je da se u Glavi V – ZAŠTITA CIVILNIH ŽRTAVA RATA, naziv Odjeljka: “2. Pomoć u troškovima liječenja i nabavci ortopedskih pomagala” mijenja i glasi: “2. Pomoć u troškovima banjskog liječenja i nabavci ortopedskih pomagala”.

Član 22. Ovim članom propisano je da se član 123. briše.

Član 23. Ovim članom propisano je da se član 124. mijenja i utvrđeno je da se pomoć u troškovima banjskog liječenja obezbjeđuje civilnim žrtvama rata koje su ostvarile pravo na: ličnu invalidninu, dodatak za njegu i pomoć od strane druge osobe ili ortopedski dodatak.

Pomoć u troškovima banjskog liječenja obezbjeđuje se osobama iz stava 1. ovog člana kojima je nalazom i mišljenjem JU “Zavod za medicinu rada Kantona Sarajevo” utvrđena potrebe za banjskim liječenjem.

Postupak, uslovi i način ostvarivanja prava na banjsko liječenje uređiće se pravilnikom koji donosi ministar.

Član 24. Ovim članom propisano je da se djetetom bez roditelja smatra dijete kojem jedan ili oba roditelja nisu živi ili jedan od roditelja nije upisan u rodni list.

Član 25. Ovim članom propisano je da dodatak na djecu u smislu člana 6. stav 2. Zakona o osnovama socijalne zaštite, zaštite civilnih žrtava rata i zaštite porodice sa djecom (federalnog Zakona) pripada djeci i nakon 18. godine života ukoliko se redovno školuju, odnosno studiraju na nekoj od visokoškolskih ustanova na području Bosne i Hercegovine, najduže do 27 godina života. Izuzetno od stava 1. ovog člana djeca iz člana 36. ovog zakona, za vrijeme školovanja i osposobljavanja za život i rad, kao i za vrijeme dok je dijete usljed bolesti ili liječenja, spriječeno da izvršava obaveze u školi, može ostvariti pravo na dodatak na djecu do 26 godina života.

Član 26. Ovim članom propisano je da se pod uslovima za ostvarivanje prava na dječiji dodatak propisanim u Zakonu o materijalnoj podršci porodicama s djecom u Federaciji Bosne i Hercegovine, djeca nakon navršene 18. godine mogu ostvariti pravo na dječiji dodatak za vrijeme redovnog studiranja ukoliko nastave redovno školovanje na nekoj od visokoškolskih ustanova na području Bosne i Hercegovine, a najkasnije do navršenih 27. godina. St. 3., 4. i 5. brisani su.

Član 27. Ovim članom propisano je da se iza člana 141. dodaje novi član 141 a. kojim se utvrđuje da:

"pravo na dodatak na djecu i dječiji dodatak za vrijeme redovnog studiranja prestaju djetetu koje studira ako:

-u toku studija izgubi više od jedne godine na visokoškolskoj ustanovi;

-nakon završenog školovanja na visokoškolskoj ustanovi upiše školovanje istog stepena.

-korisnik prava na dodatak na djecu i dječiji dodatak za vrijeme redovnog studiranja, dužan je da u svakoj kalendarskoj godini u periodu od 01. septembra do 31. oktobra tekuće godine nadležnom organu dostavi dokaze o ispunjavanju uvjeta za ostvarivanje prava na dodatak na djecu i dječiji dodatak za vrijeme redovnog studiranja.

Ukoliko korisnik iz stava 2. ovog člana ne dostavi dokaze u propisanom roku, pravo na dodatak na djecu i dječiji dodatak za vrijeme redovnog studiranja prestaje sa 30. septembrom tekuće godine. Ostvarivanje jednog od prava iz stava 1. ovog člana, ne isključuje mogućnost ostvarivanja drugog prava iz stava 1. ovog člana.”

Član 28. Ovim članom propisano je da pravo na dodatak na djecu i dječiji dodatak za vrijeme redovnog studiranja prestaje smještajem u ustanove socijalne zaštite ili institucije u koje se smještaju korisnici u skladu sa ovim zakonom.

Član 29. Ovim članom propisano je da se u Glavi VI – ZAŠTITA PORODICE SA DJECOM, u nazivu Odjeljka 2. riječi: “dodatna pomoć na ime brige i njege djeteta” zamjenjuju se riječima: “porodiljski dodatak”.

Član 30. Ovim članom propisano je da žena - majka u radnom odnosu za vrijeme dok odsustvuje sa posla radi trudnoće, porođaja i njege djeteta može ostvariti pravo na naknadu umjesto plaće i pravo na porodiljski dodatak u skladu sa ovim zakonom. Ženi – majci u radnom odnosu koja u skladu sa ovim zakonom ostvari pravo na naknadu plaće i porodiljski dodatak, može se isplatiti ukupan novčani iznos do iznosa prosječne plaće u Federaciji Bosne i Hercegovine za prethodnu godinu koja se utvrđuje na osnovu posljednjeg objavljenog statističkog podatka Federalnog zavoda za statistiku za prethodnu godinu (u daljem tekstu: ukupan iznos).

Član 31. Ovim članom dodaje se novi član 148 a. kojim se propisuje da izuzetno od člana 6. ovog zakona žena - majka u radnom odnosu koja nije državljanica Bosne i Hercegovine - u skladu sa ovim zakonom može ostvariti prava iz člana 148. ovog zakona pod uslovom da ima odobren stalni boravak u Bosni i Hercegovini, te da ispunjava uslove u pogledu prebivališta u Kantonu Sarajevo.

Izuzetno od člana 7. ovog zakona žena – majka u radnom odnosu može ostvariti prava iz člana 148. ovog zakona pod uslovom:

-da ima boravište u Kantonu Sarajevo i utvrđen status raseljene osobe, ili

-da ima boravište ili prebivalište u Kantonu Sarajevo kraće od 12 mjeseci i da otac djeteta ima prebivalište u Kantonu Sarajevo najmanje 12 mjeseci, da je zaposlena kod poslodavca čije je sjedište u Kantonu Sarajevo, ili joj je mjesto rada u Kantonu Sarajevo i da ne ostvaruje ovo pravo u mjestu boravišta ili prebivališta.

Član 32. Ovim članom kojim se mijenja član 149. propisano je da žena – majka u radnom odnosu koja najmanje 12 mjeseci prije odlaska na porodiljsko odsustvo ima zaključen ugovor o radu ili rješenje o zasnivanju radnog odnosa i prijavu na obavezno osiguranje po osnovu radnog odnosa, u skladu sa uslovima propisanim ovim zakonom, ostvaruje naknadu plaće u iznosu najniže plaće u Federaciji Bosne i Hercegovine za prethodnu godinu koju utvrđuje nadležni organ.

Žena – majka u radnom odnosu koja manje od 12 mjeseci prije odlaska na porodiljsko odsustvo ima zaključen ugovor o radu ili rješenje o zasnivanju radnog odnosa i prijavu na obavezno osiguranje po osnovu radnog odnosa, u skladu sa u slovima propisanim ovim zakonom, ostvaruje naknadu plaće u iznosu 50% najniže federalne plaće.

Žena - majka u radnom odnosu kojoj poslodavac u cjelosti isplaćuje naknadu plaće po osnovu porodiljskog odsustva ne može ostvariti naknadu plaće u skladu sa ovim zakonom.

Član 33. Ovim članom kojim se mijenja član 150 a. propisano je da žena – majka u radnom odnosu može ostvariti pravo na porodiljski dodatak ukoliko je ostvarila naknadu plaće koja je manja od ukupnog iznosa.

Ukoliko žena - majka u radnom odnosu ostvari naknadu plaće isključivo po osnovu člana 149. stav 1. ovog zakona porodiljski dodatak iznosi novčanu razliku od najniže federalne plaće do ukupnog iznosa.

Ukoliko žena - majka u radnom odnosu ostvari naknadu plaće isključivo po osnovu člana 149. stav 2. ovog zakona porodiljski dodatak iznosi novčanu razliku od 50% najniže federalne plaće do ukupnog iznosa.

Ukoliko žena - majka u radnom odnosu kod poslodavca ostvari naknadu plaće u cjelosti, a taj iznos je manji od ukupnog iznosa, žena – majka u radnom odnosu ima pravo na porodijski dodatak u iznosu novčane razlike od naknade plaće koju je ostvarila kod poslodavca do ukupnog iznosa.

Ukoliko poslodavac isplaćuje ženi – majci u radnom odnosu razliku naknade plaće od iznosa novčane naknade plaće po ovom zakonu do ukupnog iznosa i više, žena majka u radnom odnosu nema pravo na porodijski dodatak.

Ukoliko poslodavac isplaćuje ženi – majci u radnom odnosu razliku od ukupnog iznosa do iznosa njene plaće, žena – majka ima pravo na naknadu plaće i porodijski dodatak u ukupnom iznosu.

Član 34. Ovim članom kojim se mijenja član 153. propisano je da jedan od roditelja kojem je u skladu sa propisima o radu odobren rad sa polovinom punog radnog vremena, može ostvariti pravo na naknadu plaće za polovinu radnog vremena kad ne radi i to:

-za blizance, treće i svako slijedeće dijete, najduže do dvije godine života djeteta;

-za pojačanu brigu i njegu djeteta, prema nalazu nadležne zdravstvene ustanove, najduže do tri godine života djeteta.

Naknada plaće iz stava 1. ovog člana se ostvaruje u iznosu najniže federalne plaće.

Član 35. Ovim članom dodata su nova dva člana:

Član 153 a.

Jedan od roditelja kojem je u skladu sa propisima o radu odobren rad sa polovinom punog radnog vremena može ostvariti naknadu plaće za polovinu radnog vremena kada ne radi ukoliko ima dijete sa težim smetnjama u razvoju kod kojeg je nalazom nadležne ljekarske komisije utvrđen stepen invalidnosti najmanje 80% najduže do 18. godine života djeteta.

Naknada plaće iz stava 1. ovog člana se ostvaruje u iznosu najniže federalne plaće.

Pravo iz čl. 153. i 153 a. ne može se ostvariti ukoliko je dijete smješteno u ustanovu socijalne zaštite ili instituciju u koju se vrši smještaj u skladu sa ovim zakonom i hraniteljsku porodicu.

Član 153 b.

Jedan od roditelja kojem je u skladu sa propisima o radu odobren rad sa polovinom punog radnog vremena nema pravo na naknadu plaće za polovinu radnog vremena kad ne radi ukoliko:

-se roditelju u skladu sa zaključenim kolektivnim ugovorom ili unutrašnjim općim aktom ili ugovorom o radu poslodavac isplaćuje puni iznos plaće ili naknadu plaće za polovinu punog radnog vremena kad ne radi;

-drugi roditelj koji radi polovinu punog radnog vremena, a ostvaruje naknadu plaće za polovinu punog radnog vremena kad ne radi;

-je dijete smješteno u ustanovu socijalne zaštite ili instituciju u koju se vrši smještaj u skladu sa ovim zakonom i hraniteljsku porodicu;

-drugi roditelj ima status roditelja njegovatelja.

Član 36. Ovim članovima propisano je da se riječi: “dodatnu pomoć na ime brige i njege djeteta” zamjenjuju se riječima: “porodijski dodatak”.

Član 37. Ovim članom propisano je da se riječi: “dodatna pomoć na ime brige i njege djeteta” zamjenjuje riječima: “porodijski dodatak”, a novim stavom 3. da pravo na porodijski dodatak ne može ostvariti nezaposlena porodilja, ukoliko je dijete smješteno u ustanovu socijalne zaštite ili instituciju u koju se smještaju korisnici u skladu sa ovim zakonom ili hraniteljsku porodicu.

Dosadašnji stav 3. postaje stav 4..

Član 38. Ovim članom propisano je da iznos prava na porodijski dodatak koji ostvaruje nezaposlena porodilja ne može biti manji, odnosno veći od razlike ukupnog iznosa i iznosa novčane pomoći nezaposlenoj porodilji koji je ostvaren u skladu sa Zakonom o materijalnoj podršci.”

Član 39. i 40. Ovim članom propisano je da se riječi: “dodatnu pomoć na ime brige i njege djeteta” zamjenjuju se riječima: “porodiljski dodatak”.

Član 41. Ovim članom u članu 167. stav 2. iza riječi: “podnesen” dodaje se interpunkcijski znak: “zarez” i riječi: “ili od dana ispunjavanja propisanih uslova u mjesecu u kojem je zahtjev podnesen”.

Član 42. Ovim članom propisano je da se riječi: “dodatnu pomoć na ime brige i njege djeteta” zamjenjuju se riječima: “porodiljski dodatak”.

Član 43. Ovim članom propisano je da se pri upisu u evidenciju korisnika prava mora postupati u skladu sa propisom koji uređuje zaštitu ličnih podataka.

Član 44. Ovim članom propisano je da će se ustanova kazniti i u slučaju da ustanova ne primi na prihvata neku osobu, kao i ukoliko otpusti korisnika koji je smješten ili prihvaćen, a da korisnik nema obezbijeđen drugi oblik zbrinjavanja ili socijalne zaštite, ukoliko se korisnik smjesti u ustanove protivno odredbama ovog zakona, te ukoliko prioritarno ne primi na savjetovanje lice koja uputi organ starateljstva, a po osnovu postupka koje vodi organ starateljstva u konkretnom predmetu.

Prelazna odredba

Član 45. Ovim članom propisano je da su prvostepeni organi dužni po službenoj dužnosti uskladiti sa ovim zakonom postojeća rješenja kojima se ostvaruju prava koja su predmet ovog zakona u roku od 90 dana od dana stupanja na snagu ovog zakona i donijeti rješenja o prestanku prava, odnosno ostvarivanju prava iz ovog zakona. Ministar će u roku od šest mjeseci od dana stupanja na snagu ovog zakona donijeti pravilnik iz člana 124. stav 3. ovog zakona. Postupci koji su pokrenuti prije stupanja na snagu ovog zakona, a nisu okončani, okončaću se po odredbama ovog zakona.

Član 46. Ovim članom propisano je da će se osnivački i opći akti ustanova socijalne zaštite uskladiti sa članom 68. stav 4. ovog zakona u roku od 90 dana od dana stupanja na snagu ovog zakona.

Član 47. Ovim članom ovlašćuje se Zakonodavno-pravna komisija Skupštine Kantona Sarajevo da utvrdi Novi prečišćeni tekst Zakona o socijalnoj zaštiti, zaštiti civilnih žrtava rata i zaštiti porodice sa djecom.

Član 48. Ovim članom propisano je da ovaj zakon stupa na snagu narednog dana od dana objavljivanja u "Službenim novinama Kantona Sarajevo".

IV – FINANSIJSKI OKVIR

Za provođenje ovog zakona u 2024. godini potrebno je obezbijediti dodatna finansijska sredstva u Budžetu Kantona Sarajevo u iznosu od 11.722.456,00 KM.

U prilogu Tabela 1.

TABELA 1										
2023				2024						
Prosjek mjesečno				Procjena	Procjena			Procjena	Procjena	Procjena
Pravo	Broj korisnika po važećem Zakonu	Mjesečni iznos naknade po korisniku po važećem Zakonu	Ukupna prosječna isplaćena Mjesečna naknada po važećem Zakonu	Povećanje broja korisnika prema izmjenama i dopunama Zakona	Broj korisnika sa procjenom povećanja korisnika prema izmjenama i dopunama Zakona	Mjesečni iznos naknade po korisniku prema izmjenama i dopunama Zakona	Iznos povećanja naknade po korisniku prema izmjenama i dopunama Zakona	Ukupna mjesečna naknada sa procijenjenim povećanjem broja korisnika prema izmjenama i dopunama Zakona	Mjesečno povećanje prema izmjenama i dopunama Zakona	Godišnje povećanje prema izmjenama i dopunama Zakona
Stalna novčana pomoć	508	225	114.300	20%	610	300	75,00	182.880	68.580	822.960
Tuda njega i pomoć	1.368	113	153.900	20%	1642	113	0,00	184.680	30.780	369.360
Jednokratna novčana pomoć (Prema iznosu najniže penzije - 517,00 KM)	130	150	19.500	20%	156	225	75,00	35.100	15.600	187.200
Izuzetna novčana pomoć	74	300	22.200	5%	78	675	375,00	52.448	30.248	362.976
Naknada za vrijeme čekanja na zaposlenje	455	150	68.250	10%	501	225	75,00	112.613	44.363	532.356
Naknada umjesto plaće ženi-majci u radnom odnosu	1.906	1.114+ pripadajući porezi i doprinosi	2.826.896	10%	2.097	1.150+ pripadajući porezi i doprinosi	36,00	3.169.473	342.577	4.110.924
Novčana pomoć nezaposlenim porordiljama	1.790	1.114	1.994.060	10%	1.969	1.150	36,00	2.264.350	270.290	3.243.480
UKUPNO			2.501.434					6.001.544	802.438	9.629.256
Projekcija sredstava čija je namjena banjsko liječenje CIVILNIH ŽRTAVA RATA, prema dole navedenom broju korisnika na godišnjem nivou				1.000.000,00						
Projekcija sredstava potrebna za naknadu plaće jednom od roditelja za polovinu radnog vremena kada ne radi, a u skladu sa propisima o radu kada ima odobren rad sa polovinom punog radnog vremena (procjena za 100 korisnika) na godišnjem nivou				1.093.200,00						
Projekcija dodatnih sredstava na godišnjem nivou po osnovu izmjena i dopuna zakona				9.629.256,00						
UKUPNO DODATNA SREDSTVA				11.722.456,00						
Korisnici banjskog liječenja: Lična invalidnina 1.385 korisnika Dodatak za njegu i pomoć od strane drugog lica 77 korisnika Ortopedski dodatak 499 korisnika										
UKUPNO: 1961 korisnika										
UKUPNA DODATNA SREDSTVA ZA PROVEDENJE IZMJENA I DOPUNA ZAKONA O SOCIJALNOJ ZAŠTITI, ZAŠTITI CIVILNIH ŽRTAVA RATA I ZAŠTITI PORODICE SA DJECOM NA GODIŠNJEM NIVOU IZNOSE										
11.722.456,00 KM										

